

GAZTELUKO PLAZA. Barcinak dio badagoela «sentiberatasunik»

JOXE LACALLE

Gazteluko plazaren erdian azaldu den harresia.

Aparkalekuko lanekin hondakin erromatarrek suntsitu direla salatu dute

Gazteluko plazaren aldeko plataformak
lanak bertan behera uzteko eskatu du berriz

Alberto Barandiaran | IRUÑEA

Iruñeko Gazteluko plazan aparkalekua egiteko lanetan horma erromatar «ugari» eta bertan aurkitutako bainuetxe zenbaiten iturriak suntsitu dira, lanaren aurkako plataformak salatu duenez. Hori ez ezik, Erdi Aroko hilobiak eta giza hondakinak baimenik gabe altxatu, bertatik mugitu eta hainbat aurkikuntza ezkutatu egin direla ere esan dute lanen aurkakoek. Haien usteetan, aurkikuntzak nahikoak lirateke lanak ere baliogabetzeko.

Joan den astean plazaren erdian agertutako harresi ustez erromatarrek piztu du berriro Iruñean lan horien inguruko ika-mika. Murruak alderik alde zeharkatzen du plaza bera, eta eztabaida sortu du historialarien eta arkeologoen artean, usteakaba izan baita gehienentzat.

Baina lanen defendatzaile suetsuenengaino ere iritsi da eztabaida. Atzo bertan, induskatze arkeologikoak lan zibila bera baldintzatuko duela aitortu zuen Yolanda Barcina alkateak.

«Egun, garrantzitsuenak ez da lanak espero garaian bukatzea,

HONDAKINAK**Mosaikoak eta beste**

Gazteluko plaza azpian orain arte aurkitu diren hondakinen artean azpimarragarriena joan den astean agertu zen murrua bada ere, zeramika, mosaikoak eta etxeko tresneriak ere aurkitu dira; erromatarren garaikoak horiek ere. Hain zuzen, bainuetxeetan zeuden mosaikoak dira garrantzitsuenak.

baina gauzak ondo egitea». Udal taldea asko kritikatu dute lan arkeologikoak jarraitzeko trabak direla-eta, eta datozen sanferminetarako plaza ibiltzeko moduan uzteko, hondakinen garrantzia gutxietsi egin duela leporatu diote.

Balio historikoa «ezkutatzeko gogoa», plataformakoentzat

Barcinak, ordea, ukatu egin zuen horrelakorik. «Gauzak aldatzen ari dira, eta orain bada lehen ez zegoen sentiberatasun arkeologikoa. Denok aberastu gaituen proiektua izango da hau», esan zuen.

Nolanahi ere, plataformako-

entzat, lanak bertan behera utzi behar dira, berandu baino lehen. Diotenez, balio handiko hondakin historikoak agertu dira lanen artean, eta hiritarrei «ezkutatzeko gogoa» egon da haien usteetan.

Hala, zabalduetako informazioaren arabera, bi putzu agertu dira bertan, zortzi metroko saktasuna dutenak biak, eta Iruña taberna dagoen aldera zihoazen lurrazpiko eskailerak ezkutatu dituzte lanetako arduradunek. Halaber, orain arte ezagutzen ez ziren Erdi Aroko hiru hilobi agertu dira lanetan, hiruk barruan giza hondakinak zituztela.

Lehen aurkikuntza garrantzitsuari dagokionez —Erdi Aroko nekropolia—, publikoki ezagutzera eman baino hilabete eta erdi lehenago agertu zela salatu du plataformak. «Hilobiak eta hondakinak hautsi egin dira horrela, eta baimenik gabe altxatu».

Halaber, trikuharri baten itxura duen monolito handi baten berri ere eman dute, «antzinatasun handikoa irudiz», eta giza hondakin asko altxa eta altxa ari direla adierazi dute, nahiz eta horretarako baimenik eduki ez.

«Hiritarren partaidetzarekin aurkikuntza garrantzitsu hauen-tzat aterabide duina aurkitu behar da», adierazi dute.

ITOITZ

Urtegia ez betetzeko eskatu du Agoizko bi biztanletik batek

Erredakzioa | AGOITZ

Agoizko bizilagun talde batek Itoizko urtegia betetzeko lanak atzeratzeko eskatu die Ebroko Ur Konfederazioari eta Espainiako Ingurumen Ministerioari, horiek eginez gero, inguruan bizi diren guztien segurtasuna «arriskuan» jarriko litzatekeela azpimarratuz.

Agoizko bizilagun talde batek bultzatutako ekimenari atxikimendua adierazi zioten bertako 823 lagunek —erdiak ia, 1.861 lagun bizi baitira herri horretan—, eta horien guztien sinadura biltzen duen idazkia aurkeztu zuten atzo, Agoizko udaletxean bertan.

Kezka, Arturo Reboloren txostena dela eta

Bizilagunek, idazkian, beren kezka agertzen dute Arturo Rebollo ingeniariak urtegiaren segurtasunaren inguruan egindako txostenagatik, eta Itoizko urtegia beteko balitz ondorio suntsitzaileei buruz ohartarazten dute.

«Gai honi buruz dugun bakanakako iritzia independetea

kontuan hartuta», idazkia sinatzen duten agoizkoek udala bera premiatu nahi dute lanak bertan behera geldidatezela eska dezan, «bera baita gure segurtasuna bermatu behar duen lehen».

Beraz, eskaera zehatza egiten diote udalari Ebroko Ur Konfederazioa eta Ingurumen Ministerioa premia ditzan betetzeko proba guztiak bertan behera uzteko, «betez gero, sor daitekeen kontrolik gabeko egoera aldagaitza dela medio».

Halaber, aditu independenteen esku-hartzea eskatzen diote bizilagunek Konfederazioari eta Ingurumen Ministerioari, Arturo Rebollo aipaturiko arriskuen inguruan argitasuna emango bailukete. Bitartean, betetzeko probak bertan behera utzi behar direla berresten dute idazkian, «izan ere, uholdeak kaltetutako lurraldeetan bizi garenon segurtasuna kolokan jarri daiteke». Jaime Matas Espainiako Ingurumen ministroak betetzeko probak iazko urte bukaera baino lehen hasiko zirela iragarri zuen, baina lanak atzeratu dira.

BOROA

Batasuna: «Sasi-inkestan EAJ bakarrik gelditu da»

G. Agirre | BILBO

Zornotzarrekin agertu duen «errespaturik ezaren» ondorioz, Boroako zentral termikoari buruzko «sasi-inkestan» EAJ bakarrik geratu dela adierazi zuen Ibon Arbulu Batasuneko Batzar Nazionalako kideak, atzo.

Arbuluk gogor salatu zuen iganderako deitua dagoen iritzia inkestan egingo duten «nahasteko moduko» galdera. Bere hitzetan, «galdera horrekin herritarrek nahastu nahi dituzte, zentral termikoaren kokapenaz beren iritzia agertu ez dezaten. Era berean, EAJko udal taldea haustea saihestu, eta alderdiaren barruan lasaitasuna ezarri nahi dute».

Zornotzako EAJk, eta bereziki Begoña Azarloza alkateak auzi horretan izan duten jokabidea ere gaitzetsi zuen Arbuluk. «Ez du bere hitza bete, eta herri galdeketa gar-

den eta demokratikoa adostu nahi zuten oposizioko alderdiak eta gizarte elkarteak gutxietsi egin ditu».

Bestalde, gaur eguerdiko 14:00etan bukatzen da igandeko bozketan begirale legez parte hartzeko alderdi politiko zein gizarte erakundeek egiaztagirak eskatzeko epea. Ondoren, Azarloza alkateak egiaztagiriari buruzko datuak emango ditu, atzo jakinarazi zuenez.

Inkestaren antolaketa irizpideen arabera, larunbat honetan Zornotzako udaletxean egingo den ekitaldi publiko batean banatuko dituzte egiaztagiriok.

Bozketa eginez gero, EAJk bakarrik hartuko luke parte berau antolatzeaz arduratuko den bozeramaileen batzordean. Izan ere, PP, PSE-EE, EA, IU-EB eta Batasuna oposizioko alderdiek ez baitute esku hartuko, ezta Zornotza Bizirik taldeak ere.